

*"Ei, ei Camagüey, ouro e prata  
nas pinzas do boi"*

*"Loros e tucáns,  
fragatas, albatros e corvos  
mariños,  
baleas e delfín.,  
Mil candorcas e mil lingotes de  
lei"*

*Para ela!!  
Viva a Illa de Ons bucaneira!!*

Repetía o verde papagaio Robinsón, claro que por un puñado de ricos pistachos nas terrazas do bulicioso porto, ou por un dedal rebaixado con auga, ron tostado de ración, o verde papagaio cangrxeiro cantaba unha antiga canción bucaneira, do seu tío brasileiro do fondeadoiro de Botofogo, na Baía de Todos os Santos.

*"Dúas cabezas de allos, tres cebolas e  
un polbo colorado...  
Pétalos das brancas flores, rosas dos  
ventos  
Alecríns, bolboretas de sotavento  
Sete mares, alegres baladas, estelas  
chameantes  
Amores dos navegantes nas noites  
escintilantes..."*

Cunha boliña de sebo no peteiro

encargábase de engraxar as poleas dos mastros, ata a perilla do pau de mesana, a primeiras horas daquela doce mañá, nas azuis augas da animada Baía Camagüeiana, dicía o verde loro dende a alta verga da cangrexa de mesana.

*Baixo a Pedra do Louro, hai un bonito  
tesouro!!  
Salvade as perlas negras e as  
esmeraldas do Portugués!!  
Espertar pulgas de mar!!*

—Cando contempla a rocha da praia, repite o do bonito tesouro.

—Será outra vella historia dos seus tíos brasileiros. —Dicálle á bucaneira despois dun baño rápido, mergullándose coas redondas pedras da poutada, para desenrocar un rizón da época do **Santo Cristo del Buen Viaje**.

—E se ten razón? A pedra do Louro..., un tesouro da antiga Irmandade Bucaneira do ano 1.700... da Flota de la Prata.

—Robinsón soña con ocultos tesouros de vella prata e moito ouro, con perlas de fino oriente..., cacatúas..., a papagaia Negra con xoias engarzadas..., campaíñas e contos de fadas..., mil velas ou mil e unha dornas varadas.

—Sabes que é un papagaíño cangrxeiro da Baía do Corcovado, do Río de Xaneiro, un truán. E ben que se entende co Tucán aos dados.

—De verdade que é un papagaio brasileiro e coñece historias do mundo enteiro. Asubía melodías e cancións?

—Sabe de vellos mapas e canta baixo a luz dos luceiros.

—Estame a trabar un pequeno cangrexo, ih, ih, oh, oh aaaiiiii.


—Hoxe mesmo imos na falúa a Fedorentos, á Cova da Area.

—Imos cos rapaces, con tres sachos.

—Teño un intuitivo presentimento!

*Pola maxia do catalexo!!*

E embarcámonos co pícaro de Robinsón rumbo ao canal do Sur..., preto do Buraco do Inferno. A sotavento, con brisa do norte, desembarcamos na area da praia de Fedorentos, arriamos as velas e varamos a falúa coa poutada.



Uns tragos da auga con canas, gotas nas rochas, verdes fieitos, e entramos na fresca furna da baixamar, morcegos na bóveda e resoante eco.

— Queredes que vos dea un consello? Non me miredes con cara de coello! —Dixo o papagaio.

— Imos cavar na húmida area ou grava do fondo!

— Igual damos cun cofre do pirata da **Burla Negra**. —Díxenllese riseiro.

*El muerto está en el cofre!!  
Ron, ron, ron!!*

—A ver si é verdade Robinsón, a botella de ron! —Exclamou ela.

Ao cabo de tres horas de cavar e remover nas douradas areas, o sacho dun rapaz daba cunha negra madeira. Robustiano quedou pálido ao ver o ataúde relado polos vermes da area, e o verde papagaio non miraba co seu pico baixo a ala.

Asombrados acercamos o farol e quitámoslle a tapa a aquel sinistro sarcófago. Alí estaban os restos, os verdes ósos e a cadaveira. Entre o que quedaba había unha botella selada, un corroído sable pirata, verde xade nun colar, prata, perlas negras e brancas con engarces de esmeraldas.

Cun bicheiro e unha  
aixada lavamos o  
botín e cubrimos o  
esqueleto na súa  
tumba mariña... alí  
quedou a súa espada.  
Tamén embarcamos  
a bela coiraza dunha  
vella tartaruga verde  
das areas da furna  
mariña, a botella  
lacrada e o relucente  
colar con finas perlas  
engarzadas... Izamos  
velas e levantamos  
áncoras na falúa  
baixo a luz da lúa.

A bordo xa do bergantín, reunidos no salón, quitámoslle o negro tapón alcatranado ou embreado e, coa axuda dunha cana pequena, sacamos a mensaxe do pirata de aquela botella de Ron de Xamaica.

—O mapa dun tesouro. Testamento do terrible pirata Benito Bonito O Portugués do ano 1823 na Pedra do Louro, ao Sur da Baía

de Camawey... con ollo de boi... a punta do  
Manancial do Cangrexo.

O amarelento pergamiño enroscado cunha cinta de seda negra, observado con lupa, á luz das lámpadas, dicía en letras contremente redondillas, escrito en tinta china cunha pluma de qaivota macho ou de galinha.

*“Os dous cofres son para ela.  
Estou morrendo da febre marela.  
Cavade a fosa cara ao sur, na furna da  
area.*

*Na porta do inferno queda a bandeira.  
Prendede unha vela pola miña caveira  
Deixo parte do meu tesouro.  
Prata, esmeraldas, perlas negras e moito  
ouro.  
Baixo a pedra do Louro no sendeiro con bo  
ollo.*

*Dous cofres hai na illa.  
Os dous son para ela.  
Ánimas do purgatorio.  
Levádemela xunto a Ela.”*

*Benito Bonito O Portugués*  
Agosto do 1823

*Viva a Illa de Ons bucaneira!!*



Exclamamos a coro ao verde papagaio. Dêmoslle dobre ración de pistachos, figos secos e froitas silvestres, moras, ameixas, piñóns e arandos baiados amargos e morados. Uns en taparrabos e outros sen saio... atrás quedaba o corenta de maio.


Xuramos pola imandade non desvelar o segredo, e celebrámolo cunha festa a bordo do bergantín esmaltado.

Viño verde e  
pasteliños con coco  
raiado, sargos e muxes asados, nécoras e  
centolas con encarnadas ovas, percebes... e  
un lambón pouco asado con allos, poxel,  
pementa negra cunhas ramiñas de alfábaca.  
Un delicioso festín na toldiña do bergantín...  
ao rico limón. Café con nata e whisky  
vitoriano.

E acabaron co licor de cereixas á sombra do canaval camagüeiano.

Pasaban os doces días, amarraban dormas a dous cables da Punta do Fortín, soaban as buguinias do Cucorno e Canexol. Puxémonos as botas e démoslle ao legón, pero decidimos deixalo para outra ocasión, cando picara menos o sol.

Con gran amizade entre os indianos camagüeianos subministrándonos peixe fresco, mariscos e polbos secos, cabaza e



marmelo. Saboreando os deliciosos pasteis e confeituras; con intercambio de víveres en xeral, amuletos e colares de cunchas.

Chegou o 23 de xuño coa noite de san Xoán, unha gran fogueira na area, guitarras e marimbás, un violín vibraba ao son do bombo, as gaitas e o acordeón. Corría o ron queimado e augardente de caña, cantaban as cigarras. Queimadas e saborosas empanadas de xoubas, zamburiñas ou con froitas variadas. Alegre noite ao calor das brasas, baixo o inmenso ceo estrelado.

Xa ao romper a alba, ante os fieis amigos e amigas tombados nas finas areas da baía Bucaneira, conteilles a historia do terrible pirata:

“O pirata Benito Bonito O Portugués con toda unha escuadra armada ate os dentes, abordou os portos españois do Pacífico,

dende O Callao ata Acapulco. A sangue e fogo tomou o ouro fundido dos Incas, embarcando no **Virxe María de Lima** de ouro macizo, aproveitando o avance do exercito de Bolívar.

Asaltou moitas catedrais da costa da vella Prata, esmeraldas, rubís e moitas perlas negras e brancas. Unha montaña de luz colmada de brillantes.

Escondeu parte do fabuloso botín na Illa dos Cocos, a frondosa illa do tesouro, a 600 km. Ao norte das Galápagos, das Illas Charles e a de James, ou a Espanola e Isabela. Morrendo O Portugués na illa pola febre amarela, deixando os cofres do tesouro para Ela, nun agosto do ano da grazia do 1823”.

Entón resoaron unhas tremendas gargalladas... que parecían de ultratumba. E colorín colorado cantaba o verde papagaio sondando o escandallo.

*“Dúas cabezas de allos, tres cebolas e un polbo ben mallado.  
Dúas cabezas de allos, tres cebolas e un carallo.  
Nas tabernas da illa os sábados poñen callos.  
Hai viño e bo xantar, xa cantan as galiñas cos galos.”*

**A bordo do bergantín esmaltado  
maio do 2010  
Maracaibo**

